

Von de Beem unn de Tradition

Om Mondaach hadd ich de Schorsch oorufe wolle, weil ich emm e paar ahle Fotos zurickbringe wollt. Soi Fraa, dess Kättche war om Apperat unn hott merr gesaacht, dass de Schorsch drauße uff de Gass dess Laab von de Beem vom Nochber zesommekehrn det. Wenn ich wollt kennt ich emm joo e bisje helfe.

Wie ich dann zum Schorsch kumme bin, stiechter uff de Strooß unn schwätzt mettem Nochber. Gude, habb ich gesacht, ihr werdd doch koon Krach krieh weeche de Blätter?

Naa, hott de Schorsch zur Antwort gewwe, ich habb de gonze Summer iwwer moin Spass om Alfred soine Beem unn wenn jetzt die Blätter uff moi Gass falle, mach ich se halt eweg, in e paar Daach sinnse sowieso all erunner.

Sacht emol, habb ich gefroocht, moont ihr nit aach, dass jed Johr die Blätter e bisje länger hänge bleiwe? Jetz hawwe merr Allerheiliche unn erst seit e paar Daach fallese so richdisch. Vor e paar Johr noch hosde on Kerb unne om Kerweplatz koo oo Blatt mehr on de Beem geseh.

De Schorsch hott genickt: Doodeferr hott merr dann dess ersde Mol de Windermondel ooziehe misse.

No ja, hott de Alfred gemoont, wenn dess nit schunn so Klimaverännerunge sinn, von dene se alls schreiwe. De Herbst werdd länger unn dess Friejhohr kimmt eher.

Konn schunn soi, habb ich gesacht, awwer weil merrs grad von de Beem unn von de Klimaverännerunge hawwe: Aach bei de Kerb hott sich dess Klima verännert. Habder dess geheert? Doo hawwe doch so Kerle die Spitz vom Kerwebaum abgesächt.

De Schorsch druff: Debei hadde die Kerweborsch ihrn Baum beim Lui Richter abgeleecht unn gemoont, doo wärer sicher. Awwer Peifedeckel: So e paar Witzbolde sinn nachts dort uff de Holzplatz unn hawwe de Boom e Stick kerzer gemacht.

De Alfred hott sich uffgereecht: Witzbolde warn dess nit, Schorsch, dess iss mindestens Sachbeschädigung, awwer weilse uff e fremd Grundstück sinn, isses aach noch Hausfriedensbruch. Wenn ooner dess oozeiche det, dets deier wernn ferr die Brieder.

Ich habb de Kopp geschittelt: Unn doo saache se alls, dess wär Tradition. Naa, isses nit, weil e Tradition hott fesde Reechele, unn aach wennse nit geschriwwe sinn, wernse doch von jedem oigehalle. Beemabschneide geheert doo nit dezu.

Awwer villeicht iss dess die nei Tradition?, hott de Alfred gefroocht.

Ich sach: Naa. Awwer ess det Zeit wernn dass die junge Leit sich emol sesommesetze, die Vize-Vize unn die Ex-Exe, also so e paar Johrgäng. Unn de Beiemoosder, de Ehren-Kerweborsch, kennt so e Art Moderator odder Schiedsrichter mache. Doo misste se neie Reechele festleechen, misste se uffschreiwe unn die jeweilige Johrgäng misste se unnerschreiwe. Unn in so emm Schriftstick misst zum Beispill steh, dass merr koon Betong in de Baumschacht om Herrsch kippt, dass merr de Boom nit absächt unn dass die jeweilige Kerweborsch die Chefs unn koo Honnebombel sinn, dass merr also mett de Kerweborsch unn nit geeche se schafft. Die Flerschemer Kerb dets donke.

De Schorsch hott mettem Kopp gewackelt: Moonsde so ebbes wär möchlich?

Ja, habb ich gesacht, sie solldes emol versuche. Weil dann dete die junge Leit sich in fuffzich Johr noch genau so gern on ihr Kerb erinnern wie mir drei on unser.

Eiern Honnes